

編號 1 號

【耐命个黃蜚】李淑娟原作

黃蜚做得講係世界項最耐命个蟲仔，無論在仰仔个環境都得生存。先生識講過：「人類出現在地球个三億年前，黃蜚个老祖先早都在這做竇也。」厥腳髀項硬仔个短毛蓋敏感，略略仔感受著毋著向黏時走啊兩腳無揸地，一瞞目就看毋著厥蟲影也。莫看佢細細隻，該斯係佢最驚个生物哦！

冬下頭一個半夜，佢本成壅等被骨在夢裡背同孫猴仔學習長生不老；拓拓風感覺著有麼个東西對佢个嘴角趨過去，息把畏肢¹！佢伸手一搭，摸著一個硬硬滑滑个殼，隨擘開目珠分醒也。阿姆唷！在佢个枕頭項，一隻大黃蜚同佢兩對面看等，嚇啊佢心寒膽顫，尿差一息洩出來。「啊！」一聲，擲直蛤蟆肱噉啊又大又烈聲。

「恁夜也蛇聲鬼噉，噉噉滾做麼个呢？」阿姆跔等開門入來。佢一看著救星來也，共快飄過去捕緝厥肚筍，硬硬會噉出聲：「黃……黃蜚！有黃蜚！」

順等佢个拈食指看啊去，已經使出飛簷走壁大法黏在白壁牆

¹ 畏肢：音 vi ji；怕癢。

項个黃蜚，就像一個著等蓋光生²个細背老³在該抹鬚揭派頭个老先生。阿姆利利个眼箭射啊過去，手板盡遽擲出掣仔鞋，「啪！」一聲，射啊的準⁴！毋過大黃蜚也毋輸人，閉開薄翼使出舞空術，像子彈樣仔對等佢等飛過來。

「啊！」佢嚇啊噉殺天，遽啊飄上眠床，噉添放核自家已經超磅个體重，盡命拈又在眠床枋項砰飄幾下。這下慘也，毋知係眠床枋忒薄忒嫚？抑係佢忒肥忒大箍，噉噉一聲，眠床枋分佢蹬必也。

「眠床枋會分你蹬潔也，還毋共快下來……。」頭到八面威風个阿姆這下無心應戰，翻轉身來「關心」佢這受災難民，拈起拓過黃蜚个掣仔鞋大力擊佢个腳囊肚。嚇啊無命个佢一看著鞋底還穩穩黏等黃蜚个一皮薄翼，更致飄啊半天高。「砰！」一聲，衰過个眠床枋正式分佢蹬潔一大空，這下吾姆个面看起來比黃蜚還過得人驚也。

在阿姆个喝咄聲當中，翻生个黃蜚手爬腳蹶，一下就鑽入壁牆个細縫仔屏命去也。下後佢措等阿姆燒暖个被骨緊想：毋知黃蜚精係同孫猴仔比賽長生不老，哪個會過厲害？

² 光生：音 gong' sang'；喻光鮮亮麗。

³ 細背老：音 se' bi lo'；外來語，西裝。

⁴ 的準：音 dag zun'；很準。

編號 2 號

【野球】郭亭好原作

電視報出臺灣隊拿著世界野球十二強冠軍，所有个球員暢啊捕共下又噓又噉。這個冠軍，臺灣等咁三十二年。頒獎典禮放「中華奧會會歌」，去現場看比賽个臺灣球迷目汁濫汨跔等大聲唱，看轉播个佢也感動啊緊起雞嫲皮。

恁起還細時節，佢等莊項一陣細人仔陣蓋興野球，不時會邀等去練習打野球。見知啊麼个時節有野球比賽个轉播，就會相邀帶等矮楯頭，去阿量伯个雜貨店共下看轉播。大家都看啊蓋入腹，心情也會跔等中華隊个打擊同防守起起落落。看著中華隊打出安打抑係全壘打，佢等會一等暢，緊拓乳粉罐仔、叻毋會煞；毋過係分對方得分，又會緊張啊唉無停。大家平常時打球仔無半撇，毋過到轉播看比賽个時節，噯又變啊像專業个球評，若似自家蓋會樣仔。

佢等打球仔个球棒，係同賣山杉仔个阿財伯討个；球仔係學校先生無愛个網球；手落仔係佢等用幾張舊報紙層共下摺出來个；球場係阿明牯佢等屋脣个空地，再用幾塊磚角仔做壘包，登真啊會偷噓。有一擺，佢等正經在該打野球，烏狗阿旺看著佢等

个球仔，噯發肉雄，球仔傳到哪佢就超到哪；一下無注意，阿旺躍跔起來呷著球仔，就走啊田坵裡背。佢等為著愛同球仔超轉來，哪還顧得著該係人家辛苦耕个田，歸陣細人仔都飄入田坵裡背超阿旺。

在上坵田做事个阿和伯，看著佢等歸陣仔在該濶厥田，共快超過來大聲喝：「這兜發脹細人仔，禾仔都蹬死淨淨咁，無人教示係無？」哪知無超無恁死，阿旺看著大家超來，噯又過暢咁，飄上飄下走分佢等超。就恁仔，阿和伯超佢等、佢等超阿旺，一個好好个田蹬啊鬍鬚馬加¹。該日歸去過後，大家都食著大人儕準備个好料——「竹筍炒肉絲」，食啊飽餵餵仔！

大咁過後，雖然大家四散各地，過等無共樣个生活；毋過歸鄉下个時節，還係會相邀共下泡茶坐寮，講等佢等該有歡喜、有快樂、有目汁、有噓聲个童年。該下个佢等雖然麼个都無，無錢買冰、無錢買零嗒、無錢買搞个，毋過佢等有最單純个快樂，還有最珍貴个童年。

¹ 鬍鬚馬加：音 fuˋ xiˊ maˊ gaˊ；喻亂七八糟。

編號 3 號

【得人惱个木棉樹】邱碧蓮原作

學校个籃球場脣，種有兩排盡大頭个木棉樹。每年一到三、四月，木棉開花个季節，開啊盡鬧熱，歸樹頂紅啾啾一等靚。企啊樹下看，紅色个花拂等白雲，有影靚啊分人說！錫啊過路个人都講：「哇！實在靚！又浪漫哦！」但係麼人知？這花靚斯靚，乜盡減衰人。靚个後背，其實係一場得人畏又分人頭那痛啊會發青暝个惡夢。就係人講个：「看个人毋知做个人艱苦。」

寒天个九降風，咻咻滾吹等樹頂頂个葉仔搖啊搖。搖啊搖仔就落落跌，跌啊歸個籃球場幫滿个樹葉仔。負責掃籃球場个偈等，每日都掃啊嘴癢鼻絀¹，不時打早就掃啊汗流脈落，像做麼个大頭路樣仔。這兜樹葉仔實在減死人，吮掃都掃毋核。見擺正掃啊好，一陣風吹來，本成掃好个地方又歸片仔樹葉仔。籃球場攤乜一層个落葉，像係蓋被樣仔。

春天來乜，天時過燒暖兜仔，木棉花就開始大開，該像羽毛球火紅色个花蕊係另外一種風情，老實講，說得。地泥頂不時就像有一層貴貴个「花毯」，準著係毋使掃，偈可能乜會欣賞佢等

个靚！這一蕊一蕊跌下來个紅色羽毛球，帶來在外一種麻煩，實在無結煞。

續下來，花謝核乜。跔等春天个腳步漸漸仔行遠，棉仔也開始跔風飛啊歸地泥。這兜白色个棉仔，又係新个挑戰：佢等會跔等風飛啊一哪仔，飛到哪就黏在哪，每一個囡頭囡角都有佢等个蹤跡。掃毋核个棉仔，過敏个人，會緊擋目珠、緊打哈啾，實在蓋得人惱！一息都感受毋著有哪仔浪漫？掃樹葉仔、掃跌下來个花、掃棉仔，年視年恁仔過。偈投阿婆木棉樹恁得人惱，佢就講：「新娘靚斯靚，拉屎得人驚。花謝跌下來，蹴啊狗食屎。」事情總係有一好無兩好。

一年透天，木棉樹帶來無共樣个面貌。寒天个落葉，春天个落花，跔等个棉仔，故所在這木棉花季節，毋單淨欣賞佢个靚，也在這掃地个過程當中，學會乜耐心同堅持。每一擺掃地，都係同自然共下个一種方式，雖然蓋瘡，乜分偈等感受、欣賞著生活个好同壞。

¹ 嘴癢鼻絀：zoi ngauˋ pi jiu：喻不高興。

編號 4 號

【擲大索个智慧】徐熏嫻原作

這係最尾一場个冠亞軍賽！

聽著「砰！」一聲，「12 殺，12 殺」先生个大聲胥跔等起，每一個人兩隻手搭纏大索，身體向後背橫，腳躡穩向前箭，腓下用力夾纏來，心跳聲在胸脯打鼓仔。順等額頭流下來个，係增志想愛贏个汗水。

無想著，對手一抹煞同偈等擲過去，第一場个比賽嘎輸也。大家毋甘願个心情全寫在面項，想著淨伸一擺个機會，心臟就嘖嘖；脣口加油个同學乜大聲緊嘞。先生喚偈等心愛穩定下來，故一口大氣，聽節奏使力，兩隻腳像釘啊地泥下樣仔，穩穩仔箭等成功个影仔，總算拿轉拚第三場个機會。

第三場个銃仔聲「砰！」又響起，大家拿出同心協力个信心、共下喊出「12 殺，12 殺」。「一步一步退後，就係一步一步向前」，這句話也在偈个耳公脣響起。擲過來又擲過去个大索仔，就像一尾趟過來又趟過去个蛇哥，看等這尾蛇哥硬硬就愛趟過去也！同學个加油聲緊來緊大，蓋像搗手擲等該條紅色中心線，定定仔又走過來；再聽著「砰！」一聲，世界嘎恬也一秒，

黏時嘞嘞豪豪，大家都暢啊跳起來，鼓仔聲咚咚滾。無毋著！偈等贏也！

恁著這學期學校舉辦班際擲大索比賽，運動坪項輒常看著蓋多班級在該練習。該駁仔，先生在體育課教大家認識擲大索个基本規則同技巧，最記得先生講：「擲大索，毋係比麼人過大力，係比哪個班級過團結！」這句話，聽起來蓋簡單，愛做出來就無恁儘採也！為著培養大家團結合作个精神，每一擺个練習，有人个手巴掌起膘、有人个膝頭鑪啊疤疤，無就橫啊四腳惹天哇哇滾。毋過，無人講愛放棄。

這擺比賽珍貴个畫面，都係偈等進步个腳跡。擲等大索，偈等學習愛仰仔共下故氣、愛仰仔集中力量、愛仰仔堅持自家个定位、相信隊友。這毋係後退，係前進，用倒退來換轉贏面，共心正做得拗轉局勢，少一個人都做毋得。

每一場擲大索比賽，毋單淨係體能个輸贏，更致係意志力个考驗。偈等用團結合作寫也一場打拚个篇章，乜分偈學習著「退一步，就係行前一大步！」个人生智慧。

編號 5 號

【搖出味來】林芊慧原作

講著「涼水」，你會想著麼个？佢想大部分个人定著黏時就想著手搖杯。對佢來講，涼水毋單淨止渴，加過像係一種分人放鬆、細細仔个歡喜。放學過後，買一杯同朋友共下緊行緊啲、緊打嘴鼓抑好；考試考核，同自家鼓勵一下乜好。一杯涼个，做得帶分佢一個好心情。

佢最好个涼水係珍珠乳茶。乳茶該種醺醺个味緒，加上承牙个珍珠，見擺食著个時節，歸日个煩惱都會毋見核；噍珍珠該種感覺，毋知仰仔就係分人盡滿足。

毋過，學校健康教育課乜登常提醒佢等：這下盡多涼水糖分都蓋高，準著每日都啲涼水，可能會變啊肥卒卒仔，還過有蛀牙个問題。除核對佢等个身體毋好，學校先生還提醒佢等環保个问题。先生講：「你啲一杯涼水歡喜十分鐘，地球可能愛花幾十年正做得分解該兜塑膠杯仔、封膜、啖管。尤其蓋多人都濫慘擲，最尾可能會分海洋裡背个動物食著，嚴重个話還會害佢等死核。」聽乜過後佢正知：原來佢等每日啲个一杯涼水，乜屏等恁多問題。

故所，佢等屋下開始做乜一息改變。比將講：吾姆這下會自家泡茶、打果汁，還會做仙人叛加牛乳，新鮮又康健。這下佢乜會帶自家个環保杯仔去買涼水，還做得省五個銀呢！

涼水有無共樣个口味，就像人生樣仔：有人好甜个、有人好酸个、有人好醺醺个乳茶、有人好爽口个冷泡茶。佢等每一個人个人生，乜無可能單淨一種味緒。有時節係甜个，像考試打頭名、朋友送你生日禮物；有時節係酸个，像同朋友吵事；有時節係苦个，像考試壓力大。

因為有這兜無共樣个味緒，人生正會豐富、有故事，就像啲乜一口息把苦苦个釀茶過後，顛倒會過珍惜下一口甜甜个「乳蓋」。生活裡背無可能每日都順序，乜無可能日日都快樂，係講佢等肯體會這兜酸甜苦辣，這兜都係佢等成長个一部分。

涼水做得帶分人快樂，毋過佢等絕對乜愛學會去擇對身體好个、對地球友善个、過加愛知節制。就像人生共樣，毋係追求「過多過好」，係「堵堵好最好」。

編號 6 號

【 佢係細市長 】周昱原作

還細个佢，最熟事个，毋係哪間補習班抑係才藝班，加嘎¹係鬧熱、幫滿人情味个夜市仔。

為著分佢有過好个生活，阿姆日時頭在田項做事，臨暗頭又愛趕去夜市擺攤仔賣耳環、皮包仔²、夾仔這兜。美濃夜市、高樹夜市、六龜夜市……，哪片有人，哪片就有阿姆个身影。阿姆雖然每日春上春下，毋過佢無聽過佢喊苦。佢「齧等牙根擔得硬，擲等草根上得崁」个精神，係佢一生人个模範。

該下仔佢正讀國小，阿姆總會駛等厥該臺廂型車來接佢下課。該張車仔就像一個細型个倉庫，裡背堆啊幫滿个貨同鐵架仔；毋過，阿姆就像魔術師，用厥巧手「變」出一個細細个位仔分佢坐。雖然蓋尖、蓋壞坐，毋過佢還係瘰啊緊啄咕；係講無睡核，佢就會同阿姆搵手下貨、擺攤仔。當然，有時節佢會詐勢³睡核，享受一下「分阿姆惜」个特權。

攤仔擺好勢，佢會拜託阿姆分佢八十個銀，去買佢最好食个

雞排。行去雞排攤个時節，會順續「巡邏」歸個夜市仔，「監督」大家有認真做生理無，所以大家都喊佢「夜市仔个細市長」。涼水攤个阿姨會攞手喊佢去：「市長，這杯珍珠乳茶請你啉！」賣 QQ 卵个頭家也會熱情講：「阿弟牯，這包拿去同若姆共下食！」該時節个佢，手項拿等食个東西，心肚裡係滿滿个快樂同沙鼻。

夜市仔也係佢第一擺「賺所費」个地方。每擺隔壁賣香酥雞个頭家人手毋罇，就會喊佢去搵手落袋仔、秤斤兩，做兜簡單个事頭，三點鐘就賺著三百銀。對當時還細細个佢來講，就像係著著頭獎三百萬樣仔，暢啊耐毋得。係講頭家無尋佢，佢就留在阿姆个攤仔項搵手嘞⁴人客、收錢、找錢，順續蓋沙鼻个等人客阿腦佢。佢等總係嗆等講：「你除核毋曉駛車仔，還有麼个毋會个？」該時節个佢，鼻公已經翹啊嫦娥該片去也。

夜市仔，毋單淨係佢食夜、挾所費个地方，更致重要个係，該仔有佢同阿姆兩子哀快樂个回憶。這下大吔過後，每擺行入夜市仔，看著一盞一盞个電火、一個一個無閒泊杈个身影，總會恹起頭擺該段日仔、該兩子哀个身影——在夜市仔巡來巡去个細市長、用雙手撐起歸個屋下个阿姆。

¹ 加嘎：音 ga' sa；反而。

² 皮包仔：音 ka' bang e'；外來語，皮包。

³ 詐勢：音 za sii；故意。

⁴ 嘞：音 iui / iu；喊叫，此處為「吆喝吸引客人」的意思。

編號 7 號

【西瓜錫烏蠅】李怡蘋原作

佢讀小學個時節，每年暑假爺哀都會載佢去外阿公屋下奈一、兩隻月。記得有一擺，阿爸駛車仔經過西瓜田，佢看著該西瓜一粒一粒在路脣疊啊高高，脣口一個牌仔寫等「一粒 100 個銀」，阿姆黏時講：「阿姆唷，仰恁俗，摘個工錢都毋罈哦！」就喚阿爸同車仔停下來，擇乸一粒大西瓜帶去外阿公屋下。

到臨暗仔天時還蓋翕熱，食飽夜，大家將就兜幾張凳仔去大樹下奈涼、打嘴鼓。佢在灶下同阿婆搯手，同該粒大西瓜破啊一孔一孔。阿婆最惜佢，看著佢個口涎都會跌下來乸，就先切一塊分佢食。哇！沙沙、甜甜又透心涼，還好食哪！佢遽啊拿去大樹下，大家一孔食核又一孔，食啊舐嘴撒鼻。這個時節，在佢個耳公脣聽著「噏——噏——」個聲音，原來係一隻烏蠅，怕係分西瓜個甜味錫著，就在佢個脣口飛上飛下。佢盡命舐食西瓜，哪有時搭佢，就儘採用手攞兩下，想愛同佢逐走。無想著，過無一下仔，這毋知死個烏蠅又飛過來噏噏噏噏，實在還得人惱。

人講「殮殮馬乸有一步踢」，天生萬物都有厥優點同用處，像煞猛個糖蜂仔會採蜜、靚靚個揚蝶仔做得分人欣賞，做麼個這

烏蠅就無半點好呢！生啊賊仔樣，兩粒目珠仁大大粒，歸身又烏疏疏仔，淨會一哪仔緊拈，害人屙痢肚。佢蓋輒聽著大人講：「有人放符就有人收。」斡頭就問外阿公：「阿公，頭擺个人都會在屋下畜一隻貓仔來扭老鼠仔啊，你講這烏蠅最驚麼个呢？佢來畜一隻，恁仔就毋驚烏蠅來作怪乸！」阿爸在脣口聽著就詐勢¹撩佢講：「嘎佢等……畜一隻蜎蜎仔好無？」阿姆哀唷！莫講噍哪，一個得人惱、一個又得人驚，半斤八兩無過贏！

佢話都毋曾講煞，該隻烏蠅又飛轉來乸，還拈啊西瓜頂頂。佢目盯盯仔看等佢飛啊飛仔，最尾停在楯頭仔頂。欸，機會來乸，佢黏時抄啊著報紙就拈啊去……。啊！分佢飛走乸。佢喊阿爸共快來搯手，老弟乸興嘟嘟仔來鬥鬧熱。大家七手八腳，阿婆看著噍講：「毋使恁無閒，遽啊同西瓜皮收收起來，毋好放在該錫烏蠅過有影哪。」

係哦，臭肉錫烏蠅！佢共快同西瓜皮放啊地圾袋，再緝畀緝緝，恁仔這得人惱个烏蠅就無戲好唱乸。

¹ 詐勢：音 za sii；故意。

編號 8 號

【雞卵花】鍾孝昇原作

這駁仔行過社區个公園，看著雞卵花又開也。香味跔風飛，白花黃心，跌啊石頭路項，就像一粒一粒切開來个白爍卵，錫啊人停下腳步，定定仔欣賞。

佢跔下來，拈起一蕊正跌下來个雞卵花。佢雖然已經離開樹杷，毋過毋曾歿核，還係白淨白淨，有陣陣个清香味。這蕊花，黏時就分佢想起，前幾日學校舉辦个「動福卵」活動。

該日，佢等邀請著對龍潭「北一農場」來个劉大姐，分享「友善畜養」个觀念。佢表示：雞仔係畜在籠仔裡背，無法度自由行動抑係晒日頭，就會變啊蓋緊張、三時就發病，生出來个卵，當然毋康健。

佢還講：「臺灣現下正式友善畜養个雞春，大概正兩成定定；大部分个雞春，還係格仔籠畜个。『友善畜養』，係一種尊重生命个畜動物方式。」

這場活動，毋單淨係分學生仔了解動物个福利，嘛感動著家長。有一個阿姆講：「原來每一粒雞春後背，就有一隻雞嫲快樂

抑係悲慘个故事。」下二擺去市場買雞春，就會過支持「動福卵」。

活動當中，細人仔還用「動福卵」做卵捲。有一個學生仔講：「係講雞仔會噓，佢生出來个卵，一定會過康健。」聽著這句話，佢試著蓋感心。家庭教育日，佢等教細人仔安心食東西个方式，也教佢等關心生命个方式。

恁著舊年，學校同舊个雞棲改做「生命教育園區」个時節，也試辦過一個祈福卡个活動。有一個學生仔寫：「希望雞嫲做得過等幸福个生活。」短短一句話，就展現出細人仔對生命个尊重同祝福。這正經就係佢等做生命教育个目標——教細人仔對尊重一粒卵開始，了解生命个價值，學會溫柔對待世界萬物。

就像雞卵花个一生，花開代表出世，花落就係離別；雖然花落啊地泥，毋過香味還在。人也共樣，係一生人對萬物有愛、做有意義个事情，就算注定會離開，也會留下分人記得个身影。

看等公園一地泥个雞卵花，想著佢這幾年為著細人仔設計生命教育課程；雖然過程當中，有時節也會堵著打擊，毋過，過多个係感謝。因為佢知：有兜香味，毋單淨係留分自家，還有過多个係「送花分人手留香」个用途。